

On boû, on tch'vau èt on baudèt
Dispû todi vikin.n' èchone,
Sognîs, brouchetés pau minme vaurlèt,
On' ome paupjère, brâve èt midone.
On djoû qu'il arive po sognî,
I s'aporçût qu' tot l' monde fait s' mawe ;
« Qu'èst ç' qu'i-gn-a ? On s'a mârgougnî ?
Ti n' wasereûves moufeter qu'on n' ti r'clawe !
– Vos l' v'loz sawè, ç' qui s' passe véci ? »
Di-st-i l' boû, qui reûmîye tofêr ;
« I vos faureut d'ner voste avis :
Quî ç' qui c'èst, d' nos trwès, qu' vaut l' pus tchêr ?
Mès vwèsins, s' on lès vout choûter,
Sont lès mèyeûs, pace qui l' coradje
Daus cousins n'a jamais manqué :
Il ont todi l' keûr à l'ovradje.
Dismètant qu' mi, tot doûcètemint,
Dau matin à l' nêt, dji faî m' bouye
Sins couru ; mins, à l' fin dès fins,
Dji vike come li fi dèl blanke pouye. »
Li bidèt prétind qu' po l'acheter,
Si maîsse a payî one fôrtune ;
Gn-a nuk qui s'î vout mèsurer :
Il a on visadje come pli.nne lune.
Li baudèt, qu' èst pindu au clau,
On l'atèle po totes lès corwéyes ;
S' on fère lès-ôtes, li, à pîds d' tchau,
I boute à l' pleuve come à l' djaléye.
« Po fini d' compte, quî ç' qu'èst l' prumî ?

I-gn-a qu'one façon d'î veûy clér !
C'est lès-omes qu'ont tofêr dandjî
D' nos-ôtes po fé totes leûs miséres.
Su lès trwès à d'ner leûs-avis !
Li gagnant, ç' sèrè deûs conte onk. »
Lès-ome sont là, deûs grands, on p'tit,
Èt c'est l' boû, po c'mincî, qui plonke.
Li prumî juje, mârthand di tch'vaus
Vôte po l' bidèt, on s'è doteûve.
Po l' mon.nî, l' baudèt, i lî faut
S' mète à tote mwin, maïsse ou maneûve.
Li trwèsyinme, c'è-st-on vî sincî :
« Quand c'est l' momint, quî ç' qui tchèrwéye ?
Li boû, qui faît ça sins fwârcî,
C'est d' li qu' ça dèpend, nos dinréyes ! »
Li bidèt s' rècrèstéye d'on lan :
« D'après ç' qui dj' vwè, c'est chake si paurt !
– Èt après ? », di-st-i, tot riant,
Li tch'vaulî : « C'est bin l' preûve qu' i baure !!! »

Albert Delvaux